

天岳山館文鈔

天岳山館文鈔卷九

李忠壯公別傳

李公諱臣典字祥雲邵陽人年十八隨曾公國荃討賊江西隸吉
字軍繇萍鄉轉戰安福之固江進攻吉安敘把總 賞戴藍翎咸
豐八年六月及賊戰吉安南門外曾公受重創營將張公勝祿亦
中礮公瞋目大呼挺矛進賊始卻退迨吉安拔迨殺至永豐新淦
伏屍數十里以功超擢寶慶營守備九年湘軍克景德鎮並復浮
梁公皆爲軍鋒十年正月從破僞英王陳玉成於小池驛晉都司
賞換花翎進規安慶與賊戰於菱湖曾公傷礮墜馬以公馳救
得免八月圍安慶援賊不時至會樅陽告急公與張公勝祿張公

詩曰赴援一戰克之遂塞樅陽河以屯水師十一年三月王成以逆眷在皖城出死力營救身率悍黨與城賊夾攻營濠公等日夜鏖戰會提督鮑公超師至高河埠襲賊後賊皆遁仍畱悍賊築壘菱湖北圖牽制我軍公逼城而營扼北門之路兼帥游兵衛主帥六月八日攻西門賊壘曾公左臂受礮創仍以公等馳救得免而陳玉成復勾僞國宗楊輔清等數萬人來決死圍我軍數重七月二十二日大戰日中未決勝負公馳告諸將曰事急矣幸各努力成敗在此舉也諸將皆躍起公橫槊前驅與諸營乘勢決盪呼聲震屋瓦賊大敗奔斬首數千級王成輔清僅以身免八月朔遂拔安慶超擢兩江參將賜號剛勇巴圖魯畱守安慶同治元年三

月大軍攻巢縣含山和州下之並克西梁山濡須口各要隘四月
渡江克太平府及金杜關進拔蕪湖公功皆最於是會公乘勝進
攻江寧公等分取丹陽鎮秣陵關嗣是大郎橋江寧鎮三汊河
大勝關各賊壘皆下公時已擢副將晉 記名總兵矣五月四日
進攻雨花臺未下張公勝祿死之公憤甚誓以殺賊爲己任閏八
月僞忠王李秀成率蘇州賊援江寧號稱六十萬會軍中疫大作
賊偵知攻益急二十九日賊悉銳薄營會公躬督戰賊礮傷輔頰
公與副將倪公桂力衛之仍手大刀督戰會倪公死綏乃收隊而
賊攻東路益急參將劉君玉春戰死礮彈入營如雨將士多死傷
勢岌岌公毅然請於主帥願代守東路從之賊卒不能破九月十

二日賊用地雷攻我軍壘平明火發壘圯數十丈賊蜂擁入諸軍
擊卻之公奉檄防南後營汛地賊圍之是日亦大捷斬馘無算自
是軍心益固十月初五日圍解詔加提督銜十二月同奪取六
郎橋賊壘二年四月同副將趙君三元等攻克雨花臺僞城七月
同提督蕭公孚泗張公詩日等攻奪金紫山又敗賊於校場斃賊
近萬八月克富橋門尙方門方山土山等賊壘九月克北寶橋及
孝陵衛堅巢十月勦賊於解溪龍都湖熟純化鎮散名鎮皆克之
再奪秣陵關三年正月同克天堡僞城而江寧之圍始合初官軍
之擣雨花臺也夜漏三下各軍束草填濠而進梯僞城將登矣賊
驚覺然礮擊我軍軍少卻公舉旗直前大呼而進諸軍繼之爭擲

火彈入石城敵樓火我軍肉薄而登僞城立拔得 旨交軍機處

記名以提督 簡放尋補歸德鎮總兵至是天堡僞城破賊益聚

嚴我軍鑿隧道三十餘穴並爲賊所破壞五月三十日始克地堡
城六月朔各軍番休進攻賊死拒所殺傷相當公偵知城賊糧足
又官軍所掘地道皆無成各營苦戰力漸罷乃請於曾公曰師屯
城下二年矣不急克日久且生變請於龍脖子重掘地道功必成
某請獨任之龍脖子者地獨高於城賊列礮最密所也會公壯而
許之公遂率副將吳宗國等日夜穴城十五日地道成明日曾公
懸重賞嚴軍令誓一鼓破城公與劉公連捷朱公洪章武公明良
伍公維壽熊公登武張公詩日陳公壽武各具狀誓死報 國居

頃之地雷發城圯公與諸公距躍先登賊渠縱火自焚江寧城立
拔擒僞王兄洪仁達僞忠王李秀成餘黨殲焉粵賊平冊勲 詔
錫公一等子爵 賞穿黃馬褂 賜戴雙眼孔雀翎公督開隧道
時礮子中腰創甚明日城破殺賊竟日夜過勞十七日病劇以七
月十二日卒於軍年二十有七事 聞

上軫悼 優旨照提督例議卹 贈太子少保 予諡忠壯 敕
吉安安慶江寧各建專祠

贊曰賊踞金陵歲星一終矣王師攻之覆軍者再賊擱然得意謂
莫予毒也卒爲湘軍所殄而公實爲首功烏虜壯哉長沙會城
敕建三忠祠廣之爲五忠又廣之爲十二忠首祀江忠烈而以公

殿蓋與粵賊相爲起訖云

陳武烈郭勇烈王剛毅公別傳

王師之克江寧也。圍攻近四載。用地雷法穴城三十餘處。皆不就。傷亡不可選紀。洎同治三年六月朔。提督李公臣典請從賊礮最密處重闕隧道。統帥曾公國荃趨之。命各軍於城下築礮臺。護地道。別遣軍士刈濕葦蒿草積城下。覆以沙土。陽爲肉薄攻城狀。賊用全力扞爭。礮彈雨下。是月十五日。賊出死黨犯隧道。燒礮臺。我軍血戰竟夕。於是副將陳公死於戰。總兵郭公王公中礮亡。十六日地雷發。李公臣典及武公明良伍公維壽朱公洪章劉公連捷等率各軍燈附登城。賊傾火藥數十箱。燒士卒多死。勢稍卻。彭公毓橘蕭公孚泗等手刃數人。冒險入拔之。盡殲逆黨。成大功。而

三公不及見矣予悲之爲作三忠合傳

陳公萬勝湘潭人初從把總蔡呈祥援江西克萍鄉分宜旋入吉
字營克吉安敘藍翎外委咸豐十年同擊退小池驛援賊進克太
湖擢千總嗣是屢戰皆與十一年大軍克安慶進規江寧同治元
年克巢縣和州含山渡江克太平府金柱關尋取丹陽鎮奪秣陵
關暨六郎橋江甯鎮猛攻雨花臺公皆爲軍鋒閏月江寧援賊大
至九月十二日賊鑿隧道韞我營公協力扞禦襄創戰苦守四十
六日賊敗退累功洊擢副將 賜孔雀翎三年六月望李公臣典
新闕地道成統帥曾公入隧親勘之賊遣死黨出太平門直犯地
道別從朝陽門出數百人燒各礮臺及所積蘆蒿公督隊血戰竟

夕殲賊百餘人。力竭死之。賊裂屍竿其首於城翼日城拔。

郭公鵬程，湘鄉人。咸豐六年，隨羅忠節克義甯，敘藍翎把總。明年同擊走武昌援賊，擢千總。武昌復，再擢守備，加都司銜。又明年從李忠武擊退九江援賊，敗賊小池口。童司簾尋拔湖口，遷都司。

賞換花翎，加遊擊銜。冬，江西賊犯湖口，從李公續宜往援。八年克九江，晉遊擊，加參將銜。充右營營官，十年攻太湖，僞英王陳玉成糾悍賊來援，會荊州將軍多隆阿公提督鮑公超敗賊羅山沖，公與諸營夾擊擒斬三千有奇。九年從援寶慶，圍解，除參將。十年從克太湖，遷副將。英酋糾捻匪上犯，繇新安渡撲湘軍，我軍分八路進攻，公出第三路，大捷。賜號衝勇巴圖魯。十一年五月，英酋竄

踞德安隨州圖解安慶圍候補道金君國琛率八營會勦公與焉
誘賊出城斬馘數百城破追勦至應山斃賊近萬人賞二品封
典同治元年同提督蕭公慶衍攻銅城間賊堅壘死拒公與趙公
太和攻第一壘赭其巢須臾眾壘皆破援賊至公設伏黃龍村與
蕭公夾擊敗之明年克東關及和州含山巢縣復江浦浦口皖北
肅清詔交軍機處記名以總兵簡放江寧久不下奉檄與蕭
公等共帥八營往助攻三年六月挖新隧道公遣卒刈蘆蒿積城
下城上礮彈若飛蝗公奮前督攻與王公皆中礮沒於陣

王公紹義湘鄉人少入湘軍累功洊保記名總兵賜戴孔雀
翎隨攻江寧於同治三年六月十五日死綏十六日城克當事上

其功。詔曰：花翎副將陳萬勝，記名總兵郭鵬程、王紹義，功績卓著，力戰捐軀，朕甚閔之。其照提督例議卹，各賞三等輕車都尉世職。尋賜祭葬，入祀京師昭忠祠。內閣以謚請有旨。萬勝，予謚武烈。鵬程，予謚勇烈。紹義，予謚剛毅。

石剛介滕武烈熊勤勇公別傳

石公玉龍鳳凰廳人充道標練勇道光中從征崇陽亂民鍾人傑及乾州逆苗石觀保新甯匪首李沅發所至有功賜戴藍翎補外委咸豐元年隨提督向公榮解桂林圍遷把總尋繇長沙追賊至湖北敗諸洪山塔抵江南敗諸七甕橋進攻高淳公皆爲前鋒俘馘不可殫數擢千總四年金陵賊自仙鶴門出竄高資下蜀街公身先陷陣擊走之又同膊賊於黃池擢守備移攻蕪湖五年五月克之晉都司六年十二月從大軍克甯國城敗援賊逐北數十里公手刃數十賊晉游擊當是時領涇防者爲總兵秦如虎以憂歸浙江提督鄧公紹良最重公言於浙撫晏公端書會疏請以公

代詔許之以游擊充統將異數也公感知遇戰益力明年補建昌營游擊五月克復灣址及黃池又復南陵破賊於三里店除參將賜孔雀翎九年三月敗賊萬級嶺追剿至卓村斬賊目十餘人詔以副將用十月僞忠王李秀成大舉犯涇防眾十數倍公迎擊藍山嶺敗之手奪大旗而賊至益眾公擲旗怒馬突陣殺數十人賊圍之數重身受十餘創力竭死之事聞詔贈總兵加提督銜賜卹賜祠子諡剛介無子以弟子某襲世職

滕公家勝字謹亭乾州縣人起家鎮溪營戰兵咸豐二年出師廣西追賊至湖南北轉戰及江寧提督向公榮壁紫金山大戰皆捷公並從又從克高淳太平及上坊橋秣陵關所向有功歷蘇甯官

充統將尋渡江進剿鳳陽臨淮等處收復郡縣以十數敢戰出諸將右在軍中十年洊保總兵加提督銜賞換孔雀翎賜號濟特固伊巴圖魯九年奉詔援剿淮徐隸欽差大臣袁公甲三戲下時淮北河南募民稔亂曰擒匪公屢戰皆捷袁公特疏薦詔授川北鎮總兵尋以擒匪披猖留軍未赴任是年十二月有旨調徐州鎮明年正月抵任二月擒匪犯山東當是時科爾沁親王僧格林沁公帥蒙古兵剿賊都統伊興額公爲翼長夙重公威名檄赴山東堵剿公投袂起與伊公大破賊於東平州汶上縣殲賊盈千追擊二十餘里將旋師忽援賊大至寡眾不敵歸路斷公駐馬謂伊公曰男兒死耳當各努力多殺一賊卽爲天下除一害

也伊公曰然併力決盪當者輒死手刃數十人親卒喪且盡力竭並死之王以狀聞

文宗震悼 贈提督 賜祭葬 予諡武烈 賞騎都尉兼一雲

騎尉世職未幾當事疏稱公與伊公轉戰徐宿間忠勇有紀律深得民心請於死事地方合建專祠 制曰可

熊公天喜永綏廳人起軍校咸豐元年出師廣西敗賊於慶遠授鎮筭把總二年二月賊犯桂林力戰解其圍賊遂繇全州涉黃沙河衡永戒嚴南撫駱公檄防郴永八月長沙被圍公率隊來援十月十九日賊遁公追賊至湖北十一月燬洪山賊壘二十有八年敗賊於九江擢永順協千總四年敗賊於廬州擢長沙協守備

時賊踞廬久城以外屯壁相望公深入決死戰時有斬馘五年三月攻得勝門燬賊十餘營右額傷大帥嘉其勇奏授都司八月援如皋賜戴花翎十月廬州復公首登城晉遊擊賜號拔勇巴圖魯六年八月克三河鎮補岳州參將七年五月克勾容遷副將十月移師鎮江復其城詔記名以總兵用會壽春鎮闕員得旨命在軍署理未幾卽眞帥師剿東路十年正月敗賊於湖州及下關七里洲時杭州陷公帥師赴援復其城以次徇西安長興皆復三月回常州駐丹陽閏月江寧賊悉黨來犯眾十餘萬公與湖北提督王公俊力禦之相持一晝夜所殺傷相當然我軍止二千入賊至如蠆王公力竭落馬公力救之縱橫血戰賊當者輒靡而

眾寡懸殊左右馳突莫能出遂遇害時二十九日也狀聞得

旨贈提督賜祭葬及世職入祀昭忠祠予謚勤勇

贊曰古稱山西出將湖以南不與焉自嘉慶初苗蠱底定奏設三廳鎮筓始成重鎮提刑傅公又舉屯政練屯兵七十年來鎮屯兵稱勁旅將才往往出焉三公之所成就卓卓如是地固益以人重哉予嘗周歷五筓見叢山刺天溪流箭激風氣特剛勁殆不後北方之強云

彭忠壯公別傳

彭公諱毓橘字杏南湘鄉人隸湘軍勦賊以功敘從九品賞藍翎咸豐八年隨今威毅伯曾公國荃及張忠毅迎蘭合攻江西景德鎮克之遂復浮梁遷縣丞十年從復黟縣建德等城晉知縣加五品銜僞英王陳玉成率悍黨竄踞小池驛勢張甚威毅思以計取之命公與營將蕭公孚泗張公勝祿等帥師當其衝別遣守備李公臣典走間道潛焚賊館賊正與我軍相持瞥見火起軍遂亂我軍乘之賊大敗及大軍進規安慶大破賊於菱湖遂合圍明年三月掘長濠困賊陳玉成率悍賊與城賊夾犯我軍冀毀濠公等前後抵擊鏖戰數日夜適提督鮑公超帥師襲賊後敗之賊宵遁

鮑公尋殲悍賊於赤岡嶺我軍遂逼城而軍七月王成復率黨數萬來援以逆眷在圍城中也公與張公勝祿李公臣典分三路迎敵血戰竟日斬級數千王成遁越八日而安慶復矣同治元年公會諸營攻克巢縣含山和州奪西梁山濡須口諸要隘渡江破太平府奪金柱關遂取蕪湖得

旨以道員記名 簡放 賞毅勇巴圖魯名號換戴孔雀翎夏四月大軍進攻江寧公與諸將分途取丹陽鎮秣陵關六郎橋江寧鎮三汊河大勝關等要隘夷賊壘數十進攻雨花臺賊死拒未卽下閏八月僞忠王李秀成率蘇州賊援江寧凡數十萬圍官軍各壘會疫作公等力疾禦卻之賊用地雷法轟壘壘壞者數矣並以

公等力禦得完計苦守四十六晝夜賊智勇俱困十月五日解圍
迺十二月公帥師奪取大郎橋隘口二年四月破雨花臺僞城嗣
是金紫山富橋門尙方門方山土山七寶橋孝陵衛及解溪龍都
湖熟純化鎮散岔鎮諸賊壘以次下公皆在事有功三年正月攻
克天堡僞城五月克地堡至六月十六日而江寧城矣冊勳
詔交軍機處記名遇有布政使缺出請

旨簡放 賞一等輕車都尉世職久之補汀漳龍兵備道未赴會
曾公國荃奉巡撫湖北之

命疏調公領湘軍赴鄂時河南捻寇猖獗竄掠黃州安陸二郡境
公帥師進剿戰比有功六年二月十八日師進次蘄水值賊黨大

至眾數倍我軍迎勦多死傷公督隊血戰自旦至日哺馬陷泥淖
中被擒賊脅之降大罵不屈遂被害年四十有一公行軍謀勇兼
懋尤善審地勢每立營必豫籌出入險夷之路使賊不能劫屢遇
巨憝挾全力來攻而軍壘屹然公之力也死事 聞

詔賚布政使陣亡例議卹 敕湖南本籍及立功地方各建專祠
事蹟 宣付史館 贈內閣學士銜 賜祭葬 予謚忠壯 賞
騎都尉世職子秀珽併襲三等男爵

贊曰鄙語云尺有所短寸有所長以公之勇智殄十數年負嵎勦
寇無所衄及戰斬黃卒死擒寇之難豈誠有所短哉天下之變常
出於所備外也然公結髮從軍誓以死報 國久矣視襲革沙場

直猶枉席耳豈必死牖下乃爲得所哉

高勇烈公別傳

高公諱連陞字果臣甯鄉人咸豐四年投効湘軍繼曾文正嚴下
歷保千總賞藍翎是年湘軍分三營蔣君益澧將左公屬焉六
年會攻武昌掃平城外賊壘晉守備七年武昌復平蕪黃賊巢破
賊小池口乘勝復湖口彭澤望江東流銅陵諸縣公皆在事有功
晉都司奉檄充果勇營營官八年廣西寇急請濟師蔣君以知府
帥師往援公從克柳州遂游擊又克慶遠遷參將十年守桂林有
功詔以副將用又攻克賀縣加總兵銜賜號尙勇巴圖魯繼
克潯州詔以總兵記名簡放同治元年補左江鎮總兵當是
時杭州已前陷曾公爲兩江總督疏調蔣君援浙詔改浙江布

政使公遂帥師入浙從浙撫左公宗棠克壽昌進攻蘭谿湯溪盡奪其要隘八年正月拔湯溪擒首逆李尙陽誅之進擣白龍橋蘭溪賊棄城遁乘勝復龍游金華得旨以提督用二月攻富陽時賊勢猖獗總兵熊君建益戰死公悉銳攻勦八月克之十二月進攻餘杭斬逆渠鄧光明三年正月蔣君攻杭州公會諸將昇巨礮轟城門城崩賊恟懼夜五鼓棄城遁餘杭賊亦遁浙江平賞黃馬褂命署浙江提督進攻湖州七月拔之殘賊竄福建時左公遷督浙閩疏調公援勦公遂入閩漳州久不下公至則大捷屢梟逆渠詔換穆特本巴圖魯號漳州復再賞玉決拾劄管大小荷囊火鏹諸品四年擢廣東提督適金陵殘孽竄歸嘉應州公

帥師會攻拔其城盡殲逆黨粵賊平 詔賞雲騎尉世職甘肅回
匪稱亂左公改督陝甘疏調公援剿 詔改公甘肅提督公至屢
告捷破賊壘百數斬馘無算賊望風駭潰居亡何有叛勇之難楚
軍之西剿也地殘破糧價翔貴又南人不諳麪食既而餉日絀麪
食亦不飽黠者因煽爲亂八年二月二十四日部下副將鄧玉魁
楊玉魁屯宜君縣總兵唐畢賢屯楊店三營同時叛出不意夜犯
大營公遂遇害事聞斬兩玉魁軍中 優詔褒閔照提督陣亡例
從優 賜卹 予謚勇烈 敕殉難地方及本籍各建專祠入祀
京師昭忠祠 予騎都尉兼一雲騎尉世職同時殉難者曰提督
銜總兵黃君毓馥總兵銜副將賀君茂林同知銜浙江補用知縣

謝君生春四川補用副將高君英舉等並 賜卹有差。附祀公祠。贊曰：公束髮從戎，名在天下。願不死於賊而死於叛將，禍固常出於所備之外哉。軍興論將才，能與公比烈者屈指可數。計若其死之獨異，亦惟公有餘痛也。烏虜莫之致而致者天也。天實爲之，謂之何哉。

李壯烈公別傳

李公諱佑厚字奉軒世居平江長壽里余族人也少力耕傭力以養親咸豐五年余從曾文正入江西募平江軍公年甫冠充中營後哨哨目集鄉曲驍桀子弟爲數隊誓同生死每戰衝鋒一人前則眾不敢後以功累保把總 賞藍翎七年九月從守貴溪城戰甚力擢千總八年從營官屈君蟠援衢州敢戰爲諸軍冠歸解玉山圍擢守備 賞換花翎尋晉都司會余假歸以中營屬屈君屈倚公如左右手九年除夕從屈君馳援太湖大破賊遷游擊加參將銜歸防廣信十一年正月力戰受礮創曾文正嘉其能命添募副中營卽充營將俾分防玉山六月賊大至鑿隧攻城擊走之入

月賊再圍城公與決死戰大破賊 詔除副將仍從優議敘同治
元年從屈君援浙總理營務會克龍游加總兵銜二年賊萃鄱陽
章田渡公血戰破之掃平賊壘數十 詔以總兵畱江西 記名
簡用屈君卒候選道張君岳齡代之未至大吏檄公權領其眾三
年防廣豐敗僞康王汪海洋 賜號効勇巴圖魯加提督銜四年
移防會昌尋駐贛寧捕土匪五年 詔以提督記名簡用 賞一
品封典六年張君除甘肅按察使調勦陝甘逆回公從入關充營
務處兼帶兩中營七年進壁鳳翔擊退岐山賊破亢家河賊集會
勦寶雞賊解汧陽圍遂壁汧閏月破賊屈家灣草碧溝五月朔逆
回大舉犯汧至縣北馮坊河公兄總兵獻厚領副中營迎擊公自

黃里鎮防所帥中營繇東原橫貫賊陣敗之遙見張公督戰北原
乃率精銳赴之矣遇伏公手鋼叉立殪數賊策馬行忽被礮彈洞
左脅部卒力戰掖以歸自知不起以報 國養親屬其兄語不及
私昧旦卒年三十有五時公父母年皆八十矣公性沈練寡言笑
尤善觀陣闕賊陣有瑕卽乘隙攻所攻必靡或賊勢盛則堅陣相
持先爲不可敗以故經百戰無挫衄旣貴舊伍數十人相從不散
待之有加禮廉於財死事後家幾不能自存奉 旨照提督例議
卹 賜祭葬 贈太子少保 予諡壯烈 敕死事地方建專祠
宣付史館立傳入祀京師昭忠及本籍忠義祠 賞騎都尉加
一雲騎尉世職

贊曰軍興吾平死戰事者前後八千人惟公與童壯節荷易名之
典而將略亦惟公獨優公性有恆在中營凡十四年未易其處而
勲勩日隆起彼朝秦暮楚者何爲哉屈觀察立大名於饒郡贈秩
建專祠以公爲其部將也而公獨不獲竟其用悲夫

劉忠壯公別傳

劉公諱松山字壽卿湘鄉人生有智略應募入老湘營隸王壯武
鑫麾下咸豐六年從克永明江華敍外委七年從克郴州桂陽擢
千總賞藍翎進剿湖北崇通蒲圻以功賞守備銜充第四旗
營將從援江西八年克廣昌樂安晉都司會壯武卒軍張忠毅運
蘭代領其眾公從戰臨江吉水功最遂復撫州建昌及南豐遷游
擊賞換花翎賊自閩回竄江西犯新城分黨陷安仁公從解新
城圍遂克安仁遷參將粵賊何觀保李榮澈等踞連州公從忠毅
往會剿赭其巢殄賊數千擒觀保榮澈暨偽官五十餘人連州平
九年自江西轉戰至徽州屯祁門會羊棧嶺賊萬餘人自盧村來

犯公首陷賊陣，蹀血酣鬪，賊大潰，奔亡。何賊悉悍眾竄踞浮梁，及景德鎮。六月，諸軍攻景鎮，破之，窮追三十里，將抵浮梁，阻於水，有橋三，賊擁不得卽渡。因反鬪，城賊出乘之。時我軍頗亂，次人騎不相屬。公獨帥所部扼東橋，力戰卻之，遂拔浮梁。是役也，微公幾失利。詔以副將補用十年，論連州功，賞加總兵銜及志勇巴圖魯名號。十一年，從張忠毅進勦徽池，克建德縣。詔擢總兵。三月，攻徽州分屯民村，夜過半，賊出劫營，呼聲震屋瓦。諸軍驚潰，公獨帥所部山立不動。月下，遮諸軍告之曰：「我第四旗劉某也。」列隊在此，請無奔奔，則爲禽矣。軍賴以全。公自是名出諸將上。督師曾文正以國士待公，自此始。未幾，徽州復并復休寧縣。詔加公提督。

銜同治元年二月賊圍徽州公從張忠毅赴援圍解得旨下部
優敘四月從克旌德十月忠毅以疾歸曾文正檄公與壽州鎮總
兵易公開俊分統湘軍守寧國會大疫病者什七八公加意拊循
上皆力疾戰守二年八月賊犯涇公帥師迎擊敗賊於金村又敗
諸李村會粵賊號花旗者來襲郡城公馳還擊走之當是時皖南
羣盜如毛逆渠楊輔清古隆賢賴文鴻等各擁眾十數萬聞公赴
涇謀潛師襲寧國不知公已還也公遣將夜出南門設伏敬亭山
下又分所部出西門嚴陣以待遲明賊大至公啟北門鼓譟出賊
驚卻墜溝死者亡算悍賊仍死拒適西南諸將追賊至夾擊大敗
之南門賊亦敗遁歸路爲伏兵所截前沮大江溺死過半九月克

寧國縣 詔賞正一品封典 命署皖南鎮總兵四年補肅州鎮

尋調皖南時粵逆已蕩平而河南北捻匪方棘會文正以使相督師奏調公總理營務六月師次臨淮七月易公欄俊以疾歸公遂總領湘軍與捻賊回賊相終始矣湘軍之平粵逆也首尾十二三年步卒積功至專閫以千百計久役思歸休又南人不慣麥食聞勦捻率不樂隨征雖文正亦以軍士積勞久擬資遣或別募生力軍不强摯以從獨公投袂起立帥所部渡江有譁餉不肯北渡者公廉得其魁誅數人而事定五年二月公帥師自蒙亳潁川進勦河南時逆渠張總愚牛洛紅等謀竄山東公急趨濟寧賊回竄徐州四月賊擾湖團公會淮軍擊之大捷賊竄豐沛及睢寧公自徐

州遏之改竄銅山五月敗賊於魏家莊六月追賊至西華賊分道並出公力戰逾時賊敗遁至上蔡之雙廟擒斬亡算賊伏千騎萬金寨旁圖截輜重公與總兵李祥和等夾擊大破賊進攻雙廟賊悉眾迎敵敗之追奔至洪河淹斃數千餘賊遁迫及鄆師之召陵又破之七月大破賊於南陽新野得旨下所司優敘張總愚既不得志於豫乃西犯秦眾十數萬十二月公奉檄援秦六年三月詔擢廣東陸路提督時曾文正已解兵柄代之者爲使相李公鴻章張總愚犯同州朝邑陝軍迎擊於灃橋失利公帥步卒數千疾趨入關及賊於晉成堡姜彥村張兩翼前進賊敗追至許家莊小壕奪其堡賊仍糾黨旅拒勢張甚公督將士血戰四時之久

賊大奔同朝圍解 優詔賞玉柄小刀火鑷大小荷囊諸珍品秦

中自同治初元逆回構亂所屬無甯宇益以捻禍官軍屢被挫會
城岌岌公至一戰解同朝之圍大局以定然賊燄尙熾也七月公
會諸軍追賊蒲城東北敗諸索家村又敗諸昌甯村追及富平殪
賊二千有奇賊奔三原踰高陵沿渭水北岸晝夜東走公追及數
敗之九月賊陷綏德州公攻之急棄城遁十一月賊由宜州踐冰
渡河遂入山西陷吉州鄉寧公疾馳數百里一戰復吉州鄉寧賊
聞公至走河津稷山攻其城垂破矣公掩至賊又敗奔十二月追
賊至平陽喬李鎮敗之賊趨洪洞公夜帥所部繞出賊前攻原店
賊巢詰旦壘集而陣賊慮公軍追躡不意出其前也睡夢中驚潰

追擊至康衢阻小溪賊馬步爭渡陷淖中擒斬亡算賊遂回竄平陽繇絳縣出橫嶺關東犯直隸清苑境矣時陝甘總督左公宗棠帥師入衛檄公繞越太行出賊前七年正月公冒雪兼程進日行百數十里抵保定直督以 聞 命交部先行優敘賊擾獻縣商家林公擊敗之賊竄深州聞公至復西南竄公破賈城村賊巢十餘處賊走祁州公回軍追剿會援賊至我師馬隊中斷公以步軍力戰敗之追至博野南鄧村賊圍總兵郭寶昌營公揮眾馳突賊大潰窮追至深州擒斬萬計賊繇晉州竄渡滹沱河公追及河干未濟者悉殲之賊既南渡畿輔乃得解嚴捷 聞 賞換達桑阿巴圖魯三月敗賊於滑縣陽武延津等屬又敗賊於彰德四月左

公奏請以公充步軍翼長公追賊至海豐陽信越武定抵鹽山滄州連敗之遂與淮楚各軍塹長壕枯賊七月擒匪平賞穿黃馬褂及三等輕車都尉世職尋奉勦逆回之命而公馬首復西矣十一月公帥師入陝先是關隴回亂土民自相團結與回鬪及敗散無所得食因流爲土匪非其志也公至議先平土匪乃可罅力於回十二月匪目董某張某等斂軍門乞降計十七萬餘人公悉資遣之取其壯丁以運米並請振榆綏延鄜各郡難民全活無算八年二月所部駐綏德者爲會匪所誘叛踞州城公馳歸斬倡亂數十人部卒縛首逆降綏德復公坐失察奪職畱任八月帥師度隴東越花馬池進勦靈州逆回破李旺堡黑城子等處堡寨凡數

百遂復靈州。優詔開復處分十月。克里仁渠大小九寨。又克吳忠堡三十四寨。逆渠馬化隆竄踞金積堡。十一月破近堡二十餘寨。公遂駐軍吳忠堡。以規金積。九年正月。騎賊數千自胡家堡竄秦渠南。踞石家莊空堡。及馬五馬七等寨。公以地勢在所必爭。馳抵石家莊。賊於西南面築堅壘三。乃磨軍三路奮擊。各指一壘破之。賊竄入馬五等寨。公令逼寨築壘。設長圍困之。賊出馬步二千餘來援。公鏖戰破之。斃悍賊千餘。奪馬百餘匹。敗賊竄胡家堡。十五日進攻馬五寨。薄外柵。一鼓而登。守柵賊無脫者。公縱火焚寨門。策馬督攻。益急。忽礮彈中左乳墜。馬親卒掖之歸。猶大呼整隊毋亂行。諸將憤甚。卒破馬五寨。及入視公。張目曰。我受國厚恩。

未能報卽死毋遽歸我喪當爲厲鬼助君等殺賊也言訖而瞑年三十有八狀聞

上震悼命旣提督陣亡例從優議卹予諡忠壯贈太子少保銜賞騎都尉兼一雲騎尉世職入祀京師昭忠祠並於陝甘等省立功地方建專祠以所部陣亡員弁附事蹟宣付史館櫟歸著沿途地方官妥爲照料又詔本籍建專祠十年金積堡平公櫟尙未歸

穆宗追念前功命賜祭一壇十二年關內肅清詔加賞一等輕車都尉世職嗣子肅兼襲公天性忠勇寬而有制嚴而不殘治事條理秩如自結髮從戎平粵匪擒匪回匪戰績徧十三行省枕

戈十八年僅歸里一次後屢乞假省親及歸娶皆不果同治五年婦家送女至軍中而公轉戰無定所妻父攜女慙湖北江皖皆不遇至七年僑寓中州以待會公援陝道出洛陽始成禮而羽檄日數至相聚旬日遽別去每語及時局艱危輒義形於色不復知有身家性命方捻寇之入秦也曾文正飛檄別將往援不赴改檄公聞命卽行文正密疏薦公忠勇樸實可倚平寇且云臣實感而敬之左公疏稱公保垂危之秦救不支之晉又速衛 神京以步當馬爲天下先其剿逆回也無戰不克西寧回目馬朵三潛以千五百騎助馬化隆疊爲公所敗未弔月折其大半遁歸自此西寧河州及臨洮靖遠諸回酋均不敢援化隆其威震西陲能使賊聞風

瞻落實奄有古名將風烈云

贊曰詩有之靡室靡家玁狁之故霍去病亦云匈奴未滅何以家
爲兼之者其公平公旣誓爲厲殺賊及官軍平金積堡訊俘稱公
靖節後夜輒聞戈馬聲如怒潮湧至賊疑官軍來襲莫敢解衣臥
左公駐平涼時夜半忽大聲嗚嗚震山谷察之了無所見左公襲
裒帳中覺有異未幾捷書至是日馬化隆就擒矣烏虜曰星河嶽
之氣固當厯却不磨哉

黃忠壯鄧壯毅公別傳

黃公潤昌字劭坤湘潭人母胡夢虎嚙左臂而生弱冠補縣學生旋食餼咸豐初會公國荃識公稠人中九年春函召赴皖營至則會已南還無所依寓太湖藥局久之疾作賃僕竊裝逃困甚侍衛吳德水見之招入營就醫禮部主事李君榕時充欽差大臣會公營務處偶見公與語大悅延入幕明年正月從克潛山太湖敘訓導四月會公貞幹辟充營務處屯集賢關以固餉道截援賊時安慶久不下公偵知桐城人程學啟陷賊中爲僞先鋒素驍悍思招致之每獲奸細必詳訊盡得賊中情僞輒貸其死使往相勾結三反學啟果投誠公大喜與同臥起或疑之公以百口保其無他

其後佐今大學士李公鴻章力攻蘇常各郡肅清吳會官至提督
死王事本公招降力也十一年隨諸軍敗賊襲湖赤崗嶺八月克
安慶擢知縣時皖南三山賊麇聚曾公意主撫而難其人以屬公
公伉爽能任事有口辯單騎入賊巢諭以歸命賊皆感動曾大冰
雪苦凍飢公推食賑之於是降者數萬人明年奉檄遶其精銳立
爲坤字前後等營自將之并立恭字平字猛字諸營隨湘恆營攻
克繁昌以功晉同知直隸州 賞戴花翎又從克南陵太平蕪湖
及魯港金柱關東梁山諸要隘 詔擢知府加道銜五月進規江
甯扼駐三汊河護饗道賊不時來犯戰無虛日九月雨花臺援賊
悉銳圍攻四十六晝夜公躬冒矢石力禦之圍解 賞四品封典

同治二年從克雨花臺九楸洲遷守巡道。甯補用三年從克天
堡地堡兩僞城。六月望江甯地道成。明日火發城圯。公帥所部先
登漏四下賊千餘人。假官軍號衣自太平門突出。公與湘後等營
截擊盡殪之。有旨記名以按察使用。加布政使銜。賜號勳勇
巴圖魯。辦善後事宜。監修試院。四年正月請急省親。六年湖南會
匪蠢動。巡撫劉公岷檄充營務處。募定中四營於省城。備征調。七
年十一月疏調入黔。與記名布政使席君寶田會剿。十二月抵清
溪。度歲清溪固鄧公子垣壁軍所也。方苦飢。公分糧餼之。遂請設
水師扼賊運道。並募嚮導二營爲大舉進攻計。八年正月分兵擣
文德關及焦溪羊毛坪。進克兩路口。移駐之。遂克鎮遠。自是湧溪

鴉溪田垠文德關及茶園鎮賢關鼓樓坪檀頭哨翁貢等巢皆下
悉赭之先是楚軍援黔已將銅仁遵義石阡思南思州五郡教匪
勦平惟南路清江台拱及中路施秉黃平尙爲苗踞高絕十餘年
公擬攻台拱老巢先通驛路會川軍於黃平從東西兩面夾攻而
席君壁寨頭從北路逼賊乃可制逆苗之命然所部單未敢輕入
也營務處羅君瑩乃與鄧公同詣寨頭商諸席君席遣提督榮君
維善帥十三營赴之榮君素因糧於敵不攜鍋帳公令所部出次
劉家莊空其壘館之明日進攻望城坡諸葛洞甕哨等寨皆下三
月十九日復施秉明日破白洗老巢遂進攻大瓮谷龍獲牛二千
餘頭公爲招撫示十二則紫牛角驅而散之於是投誠者二千有

奇皆難髮示不復反遂乘勝長驅冀達黃平行三十里次小瓮谷
隴漏四下榮軍先行鄧公及公軍繼之抵黃飄賊設卡三重密布
隴石渠答縱榮軍出卡比鄧軍至則木石交下鎗礮子如雨我軍
力戰路險狹不能成列鄧公中礮死之或勸公退公曰星階因我
出師星階死吾何以生爲遂與羅君暨總兵彭永清凌子龍參將
楊洪亮等皆死之時二十二日也年二十有九得 旨照巡撫例
賜卹 賞騎都尉兼一雲騎尉世職本籍及死事地方 敕建
專祠事蹟宣付 公館 予諡忠壯公資識高邁志趣異常人人多
目笑之治軍嚴而有恩將弁殉陣必哭奠而歸其喪屍不獲則罪
其隊長所過無纖毫擾黔楚民皆德之工詩及行草書著有黃茅

山集

鄧公子垣新寧人星階其字也由諸生從邑人劉公坤一江公忠義勦賊湖南江西間累功洊保知縣賞藍翎咸豐十一年貴州賊竄廣西窺義寧江公檄公及參將江忠朝帥勇自武岡趨扼全州爲東安零陵等屬屏蔽四月賊由靈川渡河竄楊梅坪公與忠朝壁界首旋移防道州約粵軍夾擊賊敗遂乞降江公以病歸公與忠朝代領其眾以功遷同知直隸州賞換花翎加知府銜同治元年帥師援廣西擣蓮塘賊壘斬逆渠張高友陳士養餘黨負隅死拒公誠壯士尋僻徑捫蘿附葛出其背大呼斬關入賊驚逃公手刃二賊賊爭墜巖死餘黨窮蹙乞降蓮塘平初公援江西克

新城合圍南豐功皆最至是由江西大吏彙保 詔以守巡道陞
江西遇缺補用會貴州苗教二匪稔亂公奉檄自粵赴援累功繇
按察使銜晉布政使銜 賜號巴圖隆阿巴圖魯同治六年春進
攻苗寨公帥參將楊光保等出記名巖直趨茂林坡賊屯礮石雨
下各軍冒死入立破兩屯盡毀其礮卡追擊至傳水寨赭其巢明
年十一月黃公潤昌帥師援黔時公帥精捷營壁清溪黃公約公
同取鎮遠而公所部月餼久不至幾鼓譟黃公分饗哺之驩聲雷
動遂定計偕行八年正月自雞鳴關進攻未旬日抵兩路口破沿
途賊壘遂攻鎮遠府衙二城悍賊悉銳死拒記名提督江公忠珀
戰死公積甚親援桴鼓督攻士皆殊死戰兩城以次下近城賊壘

三十一卷三
皆擣平乃定議從東路攻入公馳謁席君寶田商進止而席軍已
深入公投袂繼進深入抵黃鵬中賊伏公決盪數十次地險狹不
能出重圍遂中礮死 詔祗巡撫陣亡例 賜卹 于世蔭建專
祠事蹟宣付史館與黃公埒諡壯毅

贊曰勦黔匪與粵寇異粵寇踞大都名城攻之利用眾黔中跬步
皆山路險絕人騎不能方行苗陟險如飛伏叢箐中用火器狙擊
人輒命中尤好設伏誘官軍黃公以平江南法施之宜其蹶矣而
鄧公亦遂同殉悲夫抑馬新息有言男兒當死沙場以馬革裹屍
還葬耳若二公者其諸不愧斯言哉

天岳山館文鈔卷十

常文節公別傳

常公諱大瀉字蘭陔衡陽人父英瑚嘉慶十四年進士以學行聞公以道光三年成進士選庶吉士授編修改山東道御史晉工科給事中掌吏科疏言天下州縣倉穀空虛或折價抵交非慎重積貯之道又言畿輔河東奸民歛錢聚眾官不能捕又五嶺南北會匪勾結督撫諱盜以無事爲福實爲隱憂又言旗營不習騎射綠旗營糧額多虛伍通衢孔道劫盜縱橫江海疏防盜艇恣山沒又牧令無兵所謂民壯復以阜隸用之甚非所以遏亂萌緝奸宄也會湖南鎮軍兵變戕營官鎮道莫敢窮治公疏劾之兼上善後五

則以救積弊曰兵勇當用土民餉米毋許勒折屯穀買補當有定價巡道出巡當報日期同知升擢毋得徑遷本道疏下所司並議行尋授福建糧道署按察使晉江令報獲洋盜三百八十餘人解行省總督欲駢誅之公謂中多脅從所全活近三百司獄積囚滿公曰囚不皆死罪而獄滿無隙地疫作且死是罪不至死而我悉殺之也乃分別定擬遣釋月餘囹圄一清遷兩浙鹽運使母憂歸起湖北按察使遷陝西布政使調湖北咸豐元年擢浙江巡撫海寇布興等自閩粵登萊擾江浙沿海焚掠公檄黃巖溫州乍浦三鎮出海捕擊而水師積罷數月不報起行公疏劾三總兵令帶罪緝拏尋親赴甯波與提督會剿降其渠凡五旬事定二年調撫湖

北當是時粵賊棘公赴岳州設水陸防未幾覬山西仍留湖北任兼署學政以助軍餉賞戴孔雀翎會賊犯長沙各屬土匪譏起有議停文武鄉試者公不可終事無譁疏請調兵嚴守岳州時兩湖重兵均調赴長沙分防岳州者僅千餘人公再請調陝甘兵三千未至而岳州土匪王萬里等糾眾千餘踞桃林肆掠公檄防兵剿之萬里逃而粵賊已繇寧鄉益陽出臨資口矣先是公檄巴陵吳士邁防水路士邁以土星港最扼要乃柵其河僅容一船魚貫通出入練漁勇守之時貨船雲集皆阻於柵不得行及賊出臨資口漁勇潰船悉爲賊有水陸並下而公所奏派守岳之提督博勒恭武亦不戰走賊遂陷岳趨武昌武昌兵裁二千餘人提督雙福

公急調防隘各兵入城守合之不盈五千又分兵五百守漢陽亡何漢陽陷賊作浮橋渡江攻城公率官民嬰守提督向公榮自湖南來援距城十餘里爲賊所鬪不能前公前後告急十餘次皆不報十二月四日地雷發城陷公縊而死年六十夫人劉氏長子都司銜集松長子婦馬氏孫女淑英並死之居民瘞公屍爲暗識焉明年正月四日賊遁得屍殮之面如生

詔贈總督 予諡文節 賜祭葬入祀昭忠祠尋 敕湖北建專祠以殉難家屬附祀 賞騎都尉兼一雲騎尉世職次子豫己酉拔貢官部郎

贊曰武昌之失或尤公部署未周或云羅文僖守長沙日必以賊

狀報公言賊趨絕地必不能下竄公恃之過深耳是皆不盡然天
方降割俾虎兕出柙橫噬十數行省彼氣方盛鄂雖欲圖存得乎
然旣與城存亡則公之力竭矣宋人弔張魏公詩云平生一段不
平氣化作祝融峰頂雲烏虜其公之謂歟

羅文僖公別傳

公諱繞典字蘇溪安化人生而有文在手曰典因名焉道光五年拔貢廷試除戶部小京官八年舉順天鄉試明年成進士選庶吉士授編修十四年分校順天鄉試明年典試四川皆得士尤究心經世學湖南徭變時

成皇帝詢軍事公圖形勢阨塞以進曹文正振鏞言於

上曰有用才也未幾上書房員闕

上詢於潘文恭世恩舉公及杜文正受田以對

上復以二人詢王文恪鼎鼎對曰羅某良吏才也會召對

垂詢良久諭近臣曰此人精神滿腹可外任十六年授平陽知

府郡故多盜獄訟繁興猾胥舞文法每私繫訟者恣魚肉公至一繩以法弊盡革經年結積獄千餘起洪洞有巨盜橫行數百里聞闖入陝豫爲害公計擒其魁赦由王鼐等數十人斬之十九年擢陝西糧道三署按察使二十一年遷山西按察使再署布政使二十四年遷貴州布政使黔地貧瘠歲倚他省協濟恆苦不給公變通鹽厰章程清庫款遇事裁節增庫貯三十萬兩購備荒穀五萬石舉胡公林翼守鎮遠徐公興煜收黃平發餉募民兵令捕誅劇盜下游苗皆歛迹遂署巡撫檄各鎮協增繕礮械無敢弗具軍政大修二十九年擢撫湖北以憂歸咸豐二年服闋入都適粵寇棘遂奉辦理湖南防務之

命公馳抵長沙賊已陷道州議增築土城南關外而以陝兵扼守石馬鋪七月杪賊從間道突至陝兵驚潰陝安鎮總兵福誠公潼關協副將尹公培立等死之公方督築土城賊旂入市始繞繇西門入閉城拒守時承平久人不知兵城中僅川兵千撫協二標兵併練勇不及千公示以鎮定又數日鎮軍兵八百人至公與巡撫駱公布政使潘公拊循激勵不惜重金賞於是川兵屯南城上者守益力而鎮軍將鄧公紹良朱公占鼐尤驍健公令駐城外分途鏖擊日有斬獲人心漸定賊於天心閣外據高阜築壘將環攻東北門會江公忠源帥所部力爭其地與賊對壘擊析聲相聞賊僅踞西南隅不能越攻則壹意掘地道直抵城根無慮十數公與新

撫張公預修月城鑿內濠并緹健卒出浚外濠破隧道七八又調鄧公及瞿副將騰龍入城爲游兵備緩急九月二十九日地雷發魁星樓側十月十二日發城外金雞橋十八夜復發於魁星樓城壞各十餘丈均爲瞿鄧諸將所堵禦賊技窮食盡十九日自燒其營繇浮橋渡湘西竄長沙解嚴方賊之驟至也羣不逞之徒競思倡劫掠公馳示各州縣趣辦團練土匪起格殺勿論風頓息是月擢雲貴總督旋以武漢淪陷奉

詔防荆襄當是時粵賊東下所在土寇蠭起三郡勢岌岌襄陽守至仰藥死公帥師駐襄擒土寇郭大安楊連科及其黨千餘人悉斬之荆襄天下衝要據江漢上游可以制賊死命自公督防土寇

不敢發南北驛道始通其後官軍復武漢以二郡爲根本賴有此
先著也居亡何署滇督吳文節攻東川逆回馬二花不下

詔公赴任公察知二花負隅死拒乃以重兵臨其前番休進擊別
遣驍將率敢死士二百人走閒道擊其後奪隘入回眾駭懼生獻
二花及酋長數十人誅之東川平四年春廣西百色土寇竄滇擊
走之然滇兵脆弱回民剽悍相仇殺不止公自揀標兵教以坐作
擊刺法密遣幹弁四出擇廠民之壯狡者募爲牙兵回知有備不
敢逞楊隆喜者貴州桐梓革役也勾眾劫縣庫作亂連陷仁懷等
縣圍遵義府城扼險拒官軍巡撫提督集兵勇二萬人援之不能
進十月二十一日公親帥所練千五百人攻城南北鳳凰頭螺螄

山各賊隘斬馘數千圍立解賊退奔雷臺山老巢公督諸軍進攻方指畫地勢失足而踣遽中風不語昇歸手書屬軍事夜漏三下卒於軍時十一月四日也年六十有二遺疏上

優詔褒閔照總督軍營病故例議卹贈太子太保賜祭葬

予諡文僖公體豐碩坐立如山飲啗兼人而自奉甚約雖貴顯不異寒素好恢諧而胥有定見膽勇尤過人躬履行間與士卒同苦樂公卒後遵義士民請建專祠祀公當事以聞詔曰可著有詩文集數十卷子燾拔貢候選知府勲廣東候補道孫清湜賞知縣

贊曰遵義古播州柳子厚謂非人所居者也公以督部之尊蒙犯

霜露以死勤事於此其世祀也宜哉公少讀書嶽麓凡十二年歲
兩歸省皆徒行曰吾以習勞也烏虜公之自刻勵久矣同治戊辰
元度帥師平教匪道遵義始拜公祠父老言及公往往悲感流涕
云

勞文毅公別傳

公諱崇光字辛階先世籍紹興客湖南遂爲善化人道光五年拔貢是年舉於鄉十二年成進士選庶吉士授編修歷充國史館協修纂修總纂武英殿纂修本衙門撰文十九年典河南鄉試明年典湖北鄉試又明年授平陽知府尋調太原府擢冀寧兵備道署按察使二十八年遷廣西按察使明年充冊封越南國王使事竣入關會寇起駐思恩南寧等府會督官軍勦賊遷湖北布政使未行李沅發反新寧奏畱會辦楚粵軍務賊平賞戴孔雀翎三十年調廣西布政使時嶺西羣盜如麻奉

旨馳驛兼程回粵駐南寧勦土匪公廣設方略用聞出奇解散匪

徒四十三起。詔賞頭品頂戴，尋督辦梧州艇匪。平之，招撫海寇張家祥，收爲部將。後易名國樑，官至江南提督，殉難。丹陽諡忠武。爲時名將，世以此多公。知人咸豐元年充欽差大臣，翼長總統各路兵馬。二年擢廣西巡撫，加節制通省兵馬銜，兼署提督。當是時，全州及潯、梧、柳、慶等屬賊蠭起，所在陸梁，恣焚掠，聚散分合，無常。民失業，或數百里無人煙。公廣布耳目，具知賊情進止，黨與離合，及彼此猜忌各情狀，每有調遣，輒洞中機宜，無虛發。人莫測所以，賊益畏而神之。公嘗言蕩寇之法，能防芟蘖之初生，則餉不虛費，能絕根莖於事後，則師不重勞。會武宣有上隊會匪將起事，公偵實，密檄在事文武撲滅之，誅其渠，餘黨駭散。鬱林州土匪黃東

桂句剽盜鍾玉保爲亂蔓延數州縣公擇健吏李孟羣劉體舒等進討一鼓平之餘用以賊攻賊法設反間使互相戕殺勢迫則自拔來投或密約擒渠魁自效公機身四應兩利而俱存之臨陣或倒戈助順或悉所部降公益結以恩信俾各招撫餘黨一年中勦撫並用計斬逆渠四十五人滅賊二百數十起亡何逆弁黃金亮叛踞平樂與興安靈川賊相犄角官軍屢攻之不下餉無出乃乞師湖南南撫駱文忠遣候補道江君忠濬知府蔣君益澧各帥師赴援始至復興安靈川及平樂其桂柳梧潯諸府以次略定公撫粵八年賊犯桂林十餘次並堅守得全居頃之餉斷兵卒飢譁謀變刃及冠者再公不動聲色卒皆悔罪投戈縛首亂者寘諸法潮

勇隊目謝揚王昌等十餘輩分屯省垣暗通賊積年驕恣多不法公召湖南援軍入密誠蔣君治具宴諸隊目酒半悉擒斬之并治其黨無脫者桂林獲安九年調撫廣東兼署兩廣總督先是泰西人擾粵海番舶逼羊城置吏失職粵東亂西人入居節署及民塵文武僚屬避居佛山鎮會城逃徙一空公聞

命兼程抵廣州從者請緩入城公叱曰非爾所知也屬吏叩馬交諫且曰入卽爲所制矣公笑曰吾奉

天子命來爲督撫不入城將焉往遂單騎疾驅入時官吏軍民環觀者數萬人均不意公敢徑入西人亦駭愕遂與營弁均列隊郊迎旣入洋酋請見公見之若無事者及論事則折以理不爲少屈

西人莫測公所爲。明日商民復業者數千家。西人氣奪因退去。詔除兩廣總督兼理鹽政。署粵海關監督。同治元年坐事。註謫部議。鑄三秩調用。詔仍以頭品頂戴充欽差。馳驛赴貴州。案事二年四月。授雲貴總督。初雲南漢回民互鬪。黠者因煽爲亂。自署督潘忠毅鐸殉難後。會城爲回所踞。守土大吏不能自異。或寢與之合。公勘黔事畢。馳抵昆明。僚屬裒袞伺進止。或尼其入。公曰。吾嘗單騎入五羊城。島夷萬計視之蔑如也。豈懾叛回哉。遂入城。文武僚吏皆從之。回漢軍民並郊迎。如抵廣東任時。旣至。語屬吏曰。漢回仇殺。乃械鬪案。不必作軍務辦也。益開誠心安反仄。武員中有初持兩端者。感公忠藎。皆革面以功名自奮。賊繇此漸平。公嘗佩

小印章其文曰忠信篤敬至是人益信其可行蠻貊云六年正月十七日卒於官年六十有六

詔稱其老成練達沈毅有爲宣力滇粵各行省能不避艱險使地方日有起色 贈太子太保照總督例 賜卹 予諡文毅 賜祭一壇本籍請祀鄉賢祠廣西請建專祠且入祀名宦並得

旨報可公所著曰易圖詳說常惺惺齋詩文稿讀書日記居官自省日記奉使越南日記子五文翹按察使銜陝西補用道文翥鹽運使銜廣東補用道輔芝同知銜直隸某縣知縣文翔福建補用通判早卒文翹布政使銜四川補用道孫啟捷廕生 賞舉人 贊曰長沙郡人二十餘年閒諡文毅者兩公兩公居相垵三百里

耳然陶公持節在道光中時海宇牧謐獨勞公遭時多故爲其難
方其單騎泣粵瀕置生死度外雖叱馭之勇曷加焉夫豈不以其
時哉語云不遇盤根錯節不足別利器公之爲其難抑卽其所以
不朽也歟

胡文忠公別傳

公諱林翼字潤芝益陽人父達源嘉慶己卯一甲三名進士官少詹事公九歲詹事公授以儒先性理書而公少負才氣不甚措思也道光十六年成進士選庶吉士授編修庚子分校會試其年秋副文端公文慶典試江南坐事降一級調用明年父憂歸服闋援例爲內閣中書捐升知府發貴州署安順府事道光之季寇亂漸萌嶺嶠以南駱越滇黔諸山中奸宄亡命狐嘯梟嘯四出劫掠勾結營兵胥役爲黨羽無敢捕治安順宋普里部也諸匪聚眾爲姦暴公延訪士紳寄以耳目偵知賊黨以歲除醵飲某所公親率健捕馳往獲著名渠魁余饒貴等其黨無一脫者在安順年餘擒巨

盜三百有奇。一郡肅然。日坐堂皇。訟牒至立與剖斷。清積案至三百餘牘。建義學十數區。接輯節孝八百餘人。彙報請旌。建總坊。稟裁書吏規費。安順二百年有司。詳報節孝。自公始。調署鎮遠府。府屬台拱清江黃平皆盜藪。勢尤橫。公治之如安順。盜幾盡。歲饑。開倉平糶。清社倉之被侵蝕者。奉檄帶兵勦黃平等屬苗匪。獲盜首保鷺等三百餘名。悉平其寨以功。賞戴花翎。會新甯李沅發爲亂。奉檄赴黎平防堵。事竣得旨。補缺後以道員用。

文宗卽位。詔大臣舉才可大任者。雲貴總督吳文韶以公名應。旋署思南府事。咸豐元年。補黎平府。詳察民情地勢。令相連爲堡。擇立鄉正團長。牌長互相稽覈。捕治諸不法者。是時廣西賊

大起永甯懷遠融縣環黎平西南界皆賊公募壯勇扼隘防堵連
結千五百餘寨建碉卡四百五十餘座上言督撫請環邊要築堡
守禦以謂言戰不如言守用兵不如用民用民力以自衛不如先
用地利以衛民郡城故無儲積勸富民捐穀置倉備城守自後黎
平疊被攻撲城卒不可拔皆公練勇儲粟力也三年秋甕安榔匪
滋事公以計散脅從誅首犯劉瞎麼餘匪悉定先是粵逆犯長沙
南撫張公亮基調公辦軍務黔撫奏留之至是吳文節由雲貴總
督調湖廣仍調公帶勇來楚辦軍務四年春補貴東道公帥黔勇
千人行次通城而吳公已戰沒黃州賊遂陷漢陽以舟師上犯陷
岳州湘陰甯鄉徑趨湘潭南撫駱文忠秉章調公自平江通城回

援省城會忠武公塔齊布及楊公岳斌彭公玉麟已破賊湘潭而安化土匪黃國旭等乘機爲亂檄公往捕計擒之而賊之敗於湘潭者悉所掠舟趨常德公以所部赴勦遷四川按察使仍畱辦防勦事是年會文正大治水陸師東征公從下岳州駱文忠奏請仍駐岳州接勦崇陽通城餘匪調湖北按察使秋會公復武漢破田家鎮進圍九江檄公會討公與羅忠節澤南勦賊湖口之梅家洲五年春賊自北岸上竄公請於會公以所部千餘人同援武昌未至漢陽失公先以軍營沌口擢湖北布政使武昌陷公退營金口與彭公玉麟水師相倚扼賊使不得上竄尋奉命署湖北巡撫時武昌三次淪陷公私掃地赤立無可措手公以謂不攻漢陽則

荆襄梗塞不攻武昌則咸蒲崇通愈形滋蔓乃添募兵勇兼顧南北兩岸賊謀襲金口營公分兵爲三路設三伏親率大隊迎擊之鐵賊七百有奇五月賊分六路來撲公用伏兵抄賊尾賊敗退屯紙坊我軍進擣其壘忽南風大起礮齊發賊狂奔入城是役也擒斬千餘官軍於紙坊金口犄角立營賊伏城不出七月由金口渡江以火船毀賊浮橋水陸夾攻遂克漢鎮公親冒矢石奪大別山賊卡未克會別賊由漢川至焚漢口公軍已一月不得食至麥山飢潰不數日整軍復戰移營大軍山分駐新堤嘉魚其時水陸萬人多新募賊至常數萬見者奪氣公從容談笑雖挫而其氣彌厲州縣殘破餉源絕文移指撥多不時應爲書告鄰省求助情詞深

痛人感其誠稍資濟之旋發其私家之穀濟軍食是年秋羅忠節破義甯州上書曾公請援武昌曾公以塔公舊部彭三元普承堯等軍益之連克通城崇陽蒲圻咸甯公親會羅軍於蒲圻併力擊賊夷其壘因偕回金口與楊公岳斌議水陸進攻策於是公率所部由中路出省城之南駐營堤上羅公由東路駐營洪山南岡畱九谿營兵駐金口護水師以當西路敗賊於五里街再敗之賽湖堤復分兵攻漢陽敗賊於龜山尾湖堤等處其鮎魚套賊艘亦被擊沈自是武昌以南無賊蹤而總督官文恭以吉林精騎合眾軍營北岸餉道日通軍勢亦日振六年三月羅公死事時方與賊相持急而軍中新失大帥公與李忠武續賓拊循而整飭之氣益壯

先是悍賊石達開由崇陽入江西連陷瑞臨袁吉撫建江西無完
土屢告急請援羅公一意規武漢不暇應至是公遣劉君鵬鴻普
君承堯出瑞州應援而令曾愍烈國華統其軍軍糧並資給焉五
月九江賊古隆賢領萬眾由葛店油房嶺後路援武昌約城賊舉
火夾攻我營公諜知之陽爲賊火城賊果出撲伏發奮殲殆盡乘
援賊初至遣兵連夜薄之賊敗走七月石達開自江南來援號十
萬公分派水陸力戰都統舒保公領馬隊自江北來大破之平魯
家巷賊壘四毀東湖賊艘七十有奇燬賊巢八十餘處會襄陽土
匪起陷樊城穀城光化竹山興山遂與川匪合陷宜昌公遣將往
平之時武昌賊窘公先與李忠武於塘角審灣洪山青山等處掘

長壕固守其魯家巷花園五里墩石觜亦如之城賊不得出援賊不得入我軍安坐以待賊糧之盡遂以十一月克省城得

旨賞頭品頂戴實授巡撫尋分兵收復武黃各縣屬餘賊遁入九江北岸小池口公計九江實江楚門戶九江一日不復江楚一日不得安枕乃令李忠武率全部圍之分兵駐黃梅廣濟蘄州以遏江北賊當是時官私廬舍焚毀幾盡諸事草創公一意振興裁浮勇以節糜費慎選賢良與民休息設清查局查被賊後州縣倉庫錢糧交代設節義局表章歷年殉難官紳士女設軍需局籌備東征餉械尤以亂民之生繇法度廢弛吏敝民嫵因循苟且以有今日不務察吏則亂源不清乃劾鎮道丞守以下數十人與屬吏更

始禁應酬戒奔競崇實黜華。於是在官者稍稍推廉。尙能知吏事矣。其籌餉有三。曰錢糧。曰鹽課。曰貨稅。湖北漕政敝。官民交困。公三次奏減。手定章程。民以是輸將足額。湖南北自淮鹽阻絕。率食川鹽。公分置課鹽局於宜昌沙市。又推行武穴老河口等處。視向來額課過之。仿劉晏用士人法。設局各市鎮。擁收釐稅。嚴杜中飽。弊自是湖北兵與餉強。天下七年。僞英王陳玉成自皖北犯蘄州。諸營敗潰。賊徑趨蘄水。武昌大震。公急渡江。駐黃州。收潰卒得數千人。而賊眾十餘萬。環巴河以東百餘里。壁互數十里。時巴水大漲。惟三台河有石橋可通。公急派千人斷橋扼河以守。而潛師出迴龍山。過其上竄。督諸軍合擊於孫家嘴馬家河等處。賊大敗狂奔。

出境斬廣肅清會將軍都興阿公及李忠武亦連破黃宿賊公遂
視師九江定方略提督楊公克小池口僞城次第復湖口彭澤東
流各縣九江勢遂孤塹長壕圍之八年四月破之磔僞侯林啟榮
等啟榮竊據四年餘塔忠武羅忠節屢攻不下至是乃獮薶無遺
種

上加公太子少保賊旋陷羅田麻城黃安遣兵分道擊之復其城
公以九江旣復安慶在所必爭奏請數路進攻楊公以水師出江
面都公繇宿松望江逼安慶城爲圍師李忠武規復太湖潛山桐
城與都公犄角會廬州失陷北路請援急忠武奉

旨催促遂分營畱守舒桐自提五千人赴援軍次三河爲援賊所

乘全軍陷焉。公時丁母憂歸。都公及總督官公請急起。公視師。公聞命痛哭起行。徑次黃州。時各軍退保黃梅。人心惶惶。聞公至。皆以手加額。自壯九年二月進營上巴河。整飭部伍。謀大舉。會石達開由南安犯湖南。掠郴桂而西。趨寶慶。號稱三十萬。湖南告急。公命李公續宜率所部往援。而以都統舒公馬隊三百佐之。又以水師二營佐湖南水師分扼諸河道。寶慶圍速解。公之力也已。而曾文正繇江西奉入川之

命。總督官公奏請與公併力圖皖。乃定四路進兵策。曾公循江而下。爲第一路。多公與鮑公超攻取潛山太湖。爲第二路。公出英山霍山。爲第三路。李公繇松子關出商城固始。爲第四路。議者以鄂

撫應駐黃州毋出境公曰吾奪情起復不赴前敵討賊則此出爲
無名十月移營英山時太湖圍師方集陳玉成來援眾數十萬多
公鮑公等悉力拒戰賊來日眾圍鮑公營數重聲息不通公調金
觀察國琛以八千人自松子關躡英山踰潛山之天堂橫出冒大
雪憑高築壘衷賊師而陣賊見之大懼而曾公亦自宿松遣師來
會十年春合擊賊於小池驛大破之遂復潛太曾江南師潰曾公
授兩江總督攜鮑公渡江次祁門謀經理徽甯爲規復蘇常之本
乃以曾公國荃圍安慶多公圍桐城李公駐青草塢爲兩軍援地
廣軍分而將軍都公又奉 旨援淮陽公悉力經畫問兵事曰惟
我任問餉事曰於我取一無所諉於人十月多公李公大破援賊

於挂車河公忿安慶久不下自英山移駐太湖度賊援皖不利必謀深入腹地以牽動諸軍乃於潛桐舒霍山險建立礮卡守以民兵命副將余際昌屯霍山防中路總兵成大吉屯羅田防北路戒以賊至勿浪戰堅守待援十一年二月賊果合捻匪分路西犯成總兵破之松子關殲其魁龔瞎子霍山守者違節度戰敗軍潰賊取其旂幟陷黃州德安孝感隨州公策賊西竄意在解皖圍皖圍解則大勢全去墮賊計非宜乃定策遣李公同援而圍皖益急賊復分黨回略蘄州蘄水黃梅廣濟以趨安慶約城賊夾擊公檄成總兵下援曾文正亦從南岸遣將破賊集賢關剷平赤岡嶺賊壘斬悍賊數千磔逆首劉瑄林而援賊自桐城來者又連爲多公所

殪蓋陳玉成據安慶爲老巢逆眷在焉故救之不遺餘力及見我懷桐潛太之師屹然不動鄂疆雖暫被擾而悍賊半被殲城中糧垂盡勢大蹙適南岸賊復繇武甯義甯內犯陷崇通蒲咸省城岌岌公力疾率師回援而皖圍終不解賊聞風遁八月朔克安慶會文正以力主圍皖議推公首功

詔加太子太保予騎都尉世職桐城廬江舒城以次下全楚肅清而公病嘔血漸不可爲矣

文宗皇帝遺詔至公攀慕悲泣病益劇遂以八月二十六日卒於軍年五十遺疏入

優詔悼惜追贈總督照總督例賜卹入祀賢良祠湖北及湖南原

籍並建專祠于子勛侯及歲時繇吏部帶領引見未幾復奉 諭
特賞于助舉人 賜祭葬 予謚文忠同治元年奉

旨賜祭一壇並 命督撫遣官前往家祠 賜祭三年江寧克復

詔賞一等輕車都尉公狀貌英偉目閃閃如燧下電威稜懾人
聰強敏給事至應機立斷無畱難苟當理艱煩重大毅然自任不
以例文拘束自言守鎮遠黎平諸劇郡捕治盜賊爲民興利除害
皆默自程課惟恐大吏聞有所牽掣清釐湖北漕務議者難之公
以部定漕折爲率因其地之肥磽缺之繁簡加輕重焉歲爲民間
省錢百四十餘萬緡爲庫項增銀四十餘萬兩提存節省銀三十
餘萬兩民與國兩利而爲州縣裁革陋規仍使有以自給籌辦鹽

課釐稅皆自定章程所派官紳各視才地所宜時加手書訓戒綜覈名實精力絕人每於理財之中暗寓察吏之法謂取民贍軍使商賈同仇敵愾卽以教忠使局員潔已奉公卽以興廉又時戒飭屬吏俾知稼穡之艱難知小民之情僞其治軍務明紀律尤加意將才曰爲統將必明大體知進退緩急機宜其次知陣法臨敵決勝又其次勇敢此大小之分也又曰兵之囂者無不罷將之貪者無不怯觀其將知其兵觀其兵亦知其將生平以天下爲己任遇事斷行無疑援江西數千人援湖南萬人皆精兵時鄂中賊方逼餉且缺公一意調遣軍糧皆自任之武昌始復卽規取九江九江復卽規安慶越境千餘里討賊制其死命督撫之以全力援鄰省

自湖北始也。圍九江，賊由江由皖犯鄂者三。圍安慶，賊由皖由江由豫，全力犯鄂。州縣城陷者十餘。公屹不爲動。其於闔屬事務大小，各軍強弱，及鄰省之優劣，高下洞然於心。而尤汲汲以獎拔人才爲事。士有志節才名，潛伏不仕千里，招致務盡其用。嘗密薦才堪大任者十有六人，多蒙擢用。嘗言國之需才，猶魚之需水，鳥之需林，人之需氣，草木之需土，得之則生，不得則死。才者無求於天下，天下當自求之。故公所特薦，不盡相識也。公自爲巡撫，念國家多難，而身負重任，益務繩檢其身，較其尺寸毫釐，而待人一秉大公，推誠相與，無粉飾周旋。天下益歸之。立寶善堂，以延賢俊之至者，察其材，隨宜任使，與所常共事文武諸公，厯六七年之久，披肝

瀝膽無幾微聞隔遇事苦心調護俾人人有布衣昆弟之歡而自
視欲然常若不足喟然曰世有伯樂而後有千里馬顧吾才智不
足有爲賢者終不我應耳庚申秋都城戒嚴急謀入衛會款議成
詔止其行

文宗升遐遠在木蘭哀詔久未下公憂思旁皇中夜扶病起立
翹望京師輒流涕病因是加篤然猶終日危坐考求兵事吏事之
要汲汲施行顧左右歎曰聞道苦晚今雖稍有所見而不及行者
多矣所著讀史兵略若干卷奏疏文集若干卷詹事公會著弟子
箴言公承其志爲箴言書院悉以家所藏書納其中使人知務實
學建胡氏家學教其族之子弟故舊親戚仰給於公者歲常數十

家嗣子子勛襲騎都尉兼輕車都尉併爲三等男

贊曰公入詞館先曾文正二年初至軍以屬禮見其後護持文正尤力文正嘗疏言胡某才勝臣十倍及上公死事狀謂其堅持之力調和諸將之功綜覈之才皆臣所不逮而尤服其進德之猛烏虜兩公戮力同心豈今人中所有哉元度戍守信州時軍餉罄公船粟來哺菜色立變又謬厠名薦牘中每讀公疏汗浹背輒自呼負負云

守江議請增兵扼湖口。又條上城守事宜。請急拆近城民廬徙城內。貧者官給以資。文毅然之。爲紳議所尼。五月賊犯江西。公擢督糧道矣。會江忠烈帥師抵九江。公亟請文毅疏調。且遣使迎之。江軍之未至也。官紳多爲避地計。公獨持守議。眾憚之。有巨紳前席歎語曰。公以守土爲必不可出耶。吾且舉公爲將。出城禦賊。公正色曰。某知與城存亡耳。巨紳默然去。尋商臬使帥二千餘人屯城外。各官爭藉差遣出城。有議退守撫州待援者。公請巡撫出王令於庭。捧令抗聲曰。王令在此。敢言棄城者軍法從事。於是眾失色。守議粗定。越二日江公至。議者猶欲要止之。使屯隔江之沙井。江公入力任城守。與公語合。遣壯士縋城焚廬舍。夜半火四起。城

外營相驚以賊至皆棄壘走輜重喪且盡於是尙書陳公臬使惲公太守耆公先後由敵臺突門入文毅大悟手二令授江公及公曰戰問江君守問鄧君蒞謹率官民以聽十八日賊大至江軍哨目李克寬戰死公撫尸哭取已花翎四品冠以殮眾爲感動六月四日地雷發城裂八丈二十三夜復發者三城裂十六七丈皆以力戰得完方事急公手劍立泥淖中冒極險或勸稍後公曰客兵血戰守士官敢惜死耶初公欲出奇計焚賊舟以鄱陽令沈君衍慶忠果有謀密檄令率所部千人備草船六十艘藏火藥泊距城四十里之烏沙港約期襲賊沈喜從之約十八夜陸軍誘賊近城別遣親卒爲沈嚮導駛赴上游縱火及期有阻之者是夕北風利

沈君侗城上無礮聲太息罷去後卒與樂平令李仁元同死寇難
進賢門者陸路咽喉也公慮無兵扼守檄衛弁改糧船數十艘爲
礮船募卒守之賊遂不敢窺截餉道八月二十二日焚營遁是役
功首江公而公守禦盡力且微公繕守備幾無從措手也寇退眾
喜公獨泣然曰賊未受大創去禍未已也亟請大修城文毅檄公
督辦遂建礮城五月城三礮臺中虛者五半虛實而袤長者六方
者三十五附女牆平設者四十礮池二十六城上官廳十七官房
五十二營棚三百三十五軍器庫十三硝磺庫四十八川門五十
八水門三十三瞭臺八望樓三又各礮城礮臺內葺官廳九官房
兵棚廚舍爲間一百一十八硝磺庫二十用銀十萬六千四百有

奇又浚環城壕深廣各三丈築臨壕礮臺甃石爲隄閘先後用銀四萬觀者見規模閎固疑所費且十倍不圖後反以城工干議也公生平持正論不迎合上官及模稜兩可用此頗叢忌嫉吳文節張文毅雅知公虛己以聽代者至皆爲蜚語所惑每計事聞公言輒厭拒之公侃侃必欲畢其辭聽者滋不納甯失事機不悔其尤關大局者莫如救義甯與吉安二役乙卯四月賊自湖北犯義甯知州葉君濟英告急公調道勇五百人往援會贛州守耆公帶勇二千至公請令駐義甯巡撫陳公令防饒郡然是年三月侍郎曾公已遣羅忠節克弋陽廣信東路固無賊也公力請改援不許十五日州再告急公申前議并請調寶勇志同軍合援又不許二十

日告被圍公請急檄防守武甯之林守懋勛率所部二千人就近援甯陳公喈曰義武等也何厚義而薄武耶公曰義甯扼三省要衝官民頻年固守團防爲江省最若棄不收後將不能責官以守城責民以團練奈大局何武甯殘破地非賊所措意且甯存則武不難復甯失則武難獨存陳公乃令藍政帶兵二百五十人往公少之具牘請濟師不報時義甯集團丁近萬候武甯師至同入援見政至大失望政中道遇賊潰鄉團喪氣二十五日陳公始調吳錫光往錫光故都司在江南犯軍法逃陳公曲宥之令帶靖勇其人驍悍而猾陳待以國士至是自都昌調之往公憂其行遲則請增調陳公曰師行矣惟吳君最速公喈然曰吳平日行速以偵知

賊退疾進圖功也。今賊勢方張，稍逡巡則事去矣。退復央南昌守言之，乃允增調寶勇。又爲異議者所格。五月初二，錫光自都昌移軍州城。於初九日陷矣。死者數萬人。葉君闔門殉難。道勇殲焉。吳軍抵湘竹，敗潰。錫光亦死。月之初五，公猶固請催調寶勇志同軍。初八抵省會。陳公曰：吳軍已足辦賊，何多爲？改調景德鎮敗信至。始調赴奉新。未幾，羅忠節自請攻義甯。公允措餉銀十萬。七月始克之。遂由寧援鄂。而陳公亦坐事罷矣。是年十月，賊自湖北陷瑞臨。又自湖南竄永新、泰和，圍吉安。下游賊復萃九江、湖口、江西大震。公添募捍衛保衛軍，城備加嚴。曾公撤九江圍師，檄副將周鳳山率三千五百人規臨瑞，戰勝於樟鎮。時防吉者按察使周公玉。

衡也警報至會官紳集議公請署撫陸公速商曾公檄鳳山乘勝
援吉以鳳山方駐新淦距吉止二百里也眾議倚周軍蔽省門持
不可公爭曰石逆知我城高池深難卒攻必爲翦枝及本之計先
擾郡縣使會城孤立然後大舉某請具狀如有賊犯城下願先伏
斧鑕以謝江西百姓且當瑞臨初陷江軍新挫楚師遠駐潯湖賊
不以此時乘虛襲我顧俟樟鎮敗後乃出攻堅下策耶就令賊來
犯但吉安圍解兩周軍必振旆回援周守汝筠之師亦可由泰和
下而駐南康之曾帥一軍駐饒之耆道一軍駐奉新之遮副將一
軍皆朝發夕至以今日之城垣兵力視咸豐三年堅強十倍豈不
能守以待援邪若懸賞二萬金剋期十日周軍必賈勇以解吉圍

圍既解則瑞臨皆可復今棄吉不援則吉必失吉贛土匪必蠢起撫建鑑吉郡前轍不復嬰城守周軍孤懸亦終歸於敗是援吉而吉固卽解江省可期肅清不援吉而吉撫建必連陷瑞袁臨皆不易復馴至全省糜爛會垣且坐困矣議者謂此會帥軍也誰尸其咎公痛哭罷尙書陳公曰公策雖不行不可無此議無此哭也且俟新中丞至圖之未幾某公涖任公仍申前議不納會周副將得吉郡血書請進止公夜謁巡撫先揖同官曰今日不得請誓不出諸君其助之自酉至丑公持議益堅巡撫姑諾之詰旦爲紳議所尼丙辰正月二十五日吉城陷周公及守令皆死之二月十五日周軍潰於樟鎮石逆遂陷撫建自贛南外八郡皆陷南昌屬縣亦

遭躡而獨不敢窺撲會垣公會議之言若瞽蔡云當是時庫藏如洗公擢按察使兼權布政使議搭放鈔票米鹽捐餉六千三百金爲寮屬倡當事檄公子輔綸及同知林君源恩會帶平江勇三千餘人益以寶勇志同軍進規撫州三月復進賢會公亦檄同知李元度帥平勇四千自湖口移師會之復東鄉兩軍破賊於河東灣四月壁撫城東南隅吉臨援賊不時至皆擊走之大小數十戰皆捷卒以師少未合圍城久不下九月分軍克宜崇援賊驟至老營陷林君死之而輔綸已爲學使者所劾於七月去軍矣學使劾輔綸臬司子不應與兵事並劾公辦城工時不能潔已遠嫌事下會公及巡撫察覆巡撫數諷公欲令出門下公不屈故進賢令潘尊

賢盜賣漕米短價萬餘金私回籍公劾之檄職按問尊賢與巡撫有舊數私謁巡撫示意南昌守欲爲脫罪公持不可尊賢撫案外事訐公然事皆無稽卒以誣論戍巡撫旣與公齟齬坐公修城時未先請勘估與曾公會疏請嚴議得旨鑄五秩調用公遂浩然歸然曾公疏猶稱公所承修爲南數省第一名城自七郡並陷賊終不敢窺省垣兵民亦有恃無恐皆此城力也公歸輸穀三千石助軍庚申冬協守州城得旨議敘又斥產捐千三百金甲子秋母夫人棄養公哀毀得疾以丙寅正月十八日卒於里第年六十有三先是道光甲申母夫人痰厥七日乃蘇公與原配鍾籲天各求減算益母壽鍾年四十卒惟公得終事太夫人公內行純篤析

筋時悉推產與兄弟以父命強受田百餘畝嘗捐金千五百勑祖祠又增置祀田學田別置義田百五十畝又以田二百畝畀舅氏前後爲伯兄償負萬金又以田八十九畝爲兄子立後州舊有賓興田爲豪猾所蝕公釐出之自捐百二十畝他善行多類此公卒後江西祀公百花洲位在江忠烈張文毅之次繼室陳氏子輔綸拔貢生辛亥副榜 賞藍翎前浙江候補道輔繹廩生江西知府加道銜輔綿山西候補知府 賞花翎輔鑾光祿寺署正銜論曰詩有之謀臧不從不臧覆用古今事類若此可勝歎哉公在承平時爲守令皆有聲冠事起力持城守議有功江西甚鉅方公與大吏巨紳斷斷爭辯時元度適在行間目擊其狀又嘗與公子

輔綸同治軍故知之悉公所持皆正論策事勢如指掌某公不足
論陳公則鄉人且同年生也而柄鑿至此何哉豈大劫不可回人
謀無自挽救邪抑曲突徙薪必不得與焦爛者同稱上客邪烏虜
非公之不幸而江民之不幸也

贈太常寺卿江西候補知府羅君別傳

羅君諱萱字伯宜湘潭人父汝懷道光丁酉拔貢芷江學訓導候選內閣中書以學行聞於時君生有夙慧工詩文書法能傳其父學爲諸生屢列優等賀督部長齡鄧廣文顯鶴沈大令道寬咸器異之咸豐四年會文正帥水師東下辟君掌機宜文字從克武漢田家鎮抵九江十二月水師失利君與同舟四三人僅以身免明年文正入南昌重整水師進屯南康視陸軍於湖口弔塔忠武於潯陽君皆策騎相從文正每口占書疏君輒操筆寫或寇警驟逼勢危甚君甘心同命又時時調護諸將俾各當其意以去六年僞翼王石達開入江西陷瑞臨袁吉撫建諸郡會城孤懸君從文正

赴南昌達開稍引去文正檄君領江軍三千人攻建昌垂克矣忽援賊大至都司黃虎臣戰死城弗下文正檄君會攻撫州甫至會曾慤烈國華劉武烈騰鴻等自鄂援江攻瑞州文正乃檄君自撫州赴瑞合攻既至賊屢搦戰屢敗之又擊走靖安奉新守隘賊當是時城賊數萬九江賊復率萬眾來援軍心未固君與劉武烈諸公堅築壘嚴陣待之八戰皆捷會文正視師瑞州君以久役乞假歸湘中未幾巡撫駱文忠檄君治湘潭團練劉總戎培元招君至衢州與謀軍事君稍規大計皆不肯久畱亦自以文士不欲竟棄科舉屢應行省試卒不遇同治元年省文正於安慶又省其從兄記名提督逢元於當塗亦不欲久居歸益肆力於學二年郭公嵩

肅撫廣東招君至粵屬以創立水師君又謝歸尋偕劉太守德謙
領威信軍防郴會霆軍叛勇大掠茶攸聞君及劉君敗賊於興寧
渡頭司叛勇潰入粵君遂進屯樂昌當事才君命增募威震軍居
頃之賊平凱撤歸自是君亦倦遊不復措意兵事矣七年冬縣人
黃忠壯潤昌奉檄援黔邀君共事君爲綜文案兼理營務處每晝
出領隊夜歸則削牘黃公性邁往不避險艱殘臘入清溪八年正
月焚逆苗數十寨遂克鎮遠府衛二城三月十七日進克施秉連
戰數日再進甕谷礮將達黃平以道隘箐深爲伏賊所截君與文
武將領十八人者皆死之時二十二日也初降苗薙髮來歸遮道
言賊已設伏毋深入時軍氣銳甚不能止及伏起路斷君揮鞭大

呼齊隊眾潰亂親卒陳祿八中創哭曰柰何君曰死此耳忽鎗彈傷君左腹墜馬舊卒曹某掖之行君揮令逃生遂死之年四十有三君貌溫雅文翰流美而性極恹退從軍十數年不趨便營利亦不圖仕進初從水師東征敍訓導入江西遷知縣加知州銜在安徽彙保同知畱江西補用樂昌解嚴加知府銜克鎮遠晉知府既死事優旨眡按察使陣亡例議卹賜祭葬贈太常寺卿賞騎都尉世職祔祀黃忠壯祠所著儀鄭堂文箋注二卷粵遊日記一卷蓼花齋詩詞四卷

贊曰君與余共事戎幄余嘗弟畜之九江之役曾文正誓身殉余與君等共掖文正上小舟達南岸入羅忠節營時火光夜燦數十

里人聲與江潮聲相亂也。同治元年余遭吏議君省余江山其後數相見長沙又數年君竟死黔難悲夫曾文正誌君墓以謂君不得一伸其志乃當世有陶鑄大才之責者之咎故引爲內疚而尤惜之烏虜君何以得此於文正哉卽其賢可知已。

贈太僕寺卿運同銜河南補用直隸州田君別傳

田君諱玉梅字鼎臣龍山人少跳踉不羈從塾師受章句意弗耐也則去之距所居十餘里有巖洞幽險絕人迹君獨居三年日誦陰符遁甲諸書鬼物蛇虎無所擾及出與人言率恢奇滉瀟人莫測所以也年二十走京師與人言星象謂天下且苦兵坐妖言陷刑部獄君笑曰我豈妄哉踰年當見信矣既而果得釋咸豐三年走江南大營以策干提督向公榮請潛入江寧城約諸被脅者翻城應官軍有張炳垣者俠士也陷賊中夙與君善君變服夜入城與謀炳垣爲通款數十人皆約內應及期君乘閒登城斬賊首擲城外而官兵負約無至者謀且泄賊拘炳垣鞠其黨備五毒炳垣

抵死不言同謀者君伏水竇中五日夜得脫將出城猶襲殺僞官
五人門者十餘人凡三出三入無知者軍中以此奇君君既恥其
言不售復脫身北走投効河南時賊踞正陽關官軍屢攻不下君
率川楚軍協剿夜領壯士八人緣埤堦上會風雨大作君與八人
者大呼擲火毬賊驚不辨多寡大驚潰官軍蹴之遂克正陽關君
擢知縣加五品銜賞藍翎七年從欽差大臣勝保剿捻寇當
是時固始被圍久內外鬲絕君領偏師援之至則屯大隊於後而
自率精騎數十衝入城復選城中驍騎益之突出蹂賊當者盡靡
而大隊自後夾攻之賊腹背受敵大敗奔圍解

詔加運同銜

賞換花翎

賜號卓勇巴圖魯尋補太康知縣晉

同知直隸州十年秋泰西人犯天津京師戒嚴

上北狩木蘭君上書大府請濟師勤王。大府以爲狂。三檄止之。君投檄抵地罵曰。犬馬知衛主。烏有食君父之祿。不急其難者。乃自帥所部行。至汝陽沙官橋。爲捻匪所阻。眾有難色。君素輕捻匪。又北行急。乃忼慨誓師曰。吾屬勤王。方冀立奇功。何遽爲螳賊所闕。乃大呼直前搏戰。賊敗。追奔三十餘里。援軍不相屬。從者裁十餘騎。賊瞰君勢孤。乃反鬪。圍君數匝。君手弓。左右持刀。且戰且射。自昧旦至日昃。手殺傷數十人。賊卒不退。圍益急。後軍阻賊不得前。君馬中流矢。將踣。回顧從者。僅存一跛卒。乃棄刀下馬。拔所佩劍。徒步決盪。卒呼曰。賊壘在北。公北行。圍益厚。不可出。必南行。吾後

軍幸至或得脫乃轉戰而南時已薄暮賊恐失君以火鎗叢擊之洞胷而死死良久賊篝火求其屍得之將斷其首屍突起撞持刀賊仆地死賊駭奔驚以爲神立即移屯去時八月六日也年三十二後軍至斂其屍歸葬龍山跋卒佯死伏草中得免具述君死狀事聞得

旨優卹如典禮

贈太僕寺卿

賜祭葬

子雲騎尉世職

敕

汝甯建專祠君饒血性急人之難忘其軀誓不相背負在江甯有陸某陷賊中君潛入城遍覓得之攜以出或詢賊中事語及張炳垣輒嗚咽流涕云

贊曰君天下奇男子也其蹤迹奇詭及死事之烈周孝侯曷以加

哉軍興已來吾楚人以義烈著者僂指難畢數而莫奇於君人奇功亦奇年甫三十卒以奇烈死悲夫孔子曰志士不忘在溝壑勇士不忘喪其元君儻其流亞歟

印江縣知縣鄧君別傳

君諱玲筠字沼薌原名凌雲甯鄉人父光廷邑諸生早世母吳撫之成立以節孝旌門君生七歲而孤踰冠舉道光二十三年鄉試五上春官不第咸豐六年以知縣發貴州七年四月權知印江縣時黔中俶擾苗教匪充斥匪酋以邪教蠱亂民有黃號白號等目團練多叛應之列郡無完土君下車壹意以約已便民爲務求先達下情每芒屨布韞周巡村落間與田畝耆叟握手詢利病凡道里阨塞士紳賢否及豪右莠民姓字皆手疏小冊藏夾袋中戴星出入民莫知爲官也而椎埋博塞諸白徒輒不意見執訟者至旣察其情僞復徵諸冊片言摘發民驚以爲神先是思南賊熾地

連印江君亟行保甲法。慮以具文視也。乃單騎詣各鄉。手自敦率。戶給門牌如式。署紙尾十則。曰忤逆。曰習邪教。曰私結盟黨。曰劫掠。曰藏匪類。曰竊盜。曰容留娼妓。曰賭博。曰鬪毆生事。曰唆訟。各釋士紳董之犯者。同甲勿與齒。改悔者許具狀保。於各條下加小印曰自新。其頑抗及無人敢具保者治之。且計月以驗紳董之能否。加勸懲焉。甫數月。訟獄衰息。夜不閉戶。臥乃加意課士。割俸助書院餐錢。與講求經世學。並及軍政。士皆畏愛之。勸民修水利。築陂塘。揭示教以法。纖悉備具。有以浚塘聞者。親履勘指示。至再三不倦。終不以勺水擾民。慮邪教之蠱民也。爲文告。抉摘其所以然。雖老嫗能解。簡壯丁數百。親教以擊刺法。民間所輸餉皆筦以士。

紳一錢不以自污。是年十二月，賊陷思南。太守福君投水死。賊長驅犯印江。印故無城。君出營於雲泮，以禦之。賊耳君名，以書來假道，請終君任，不復犯印。君焚書，斬其人。賊分黨綴君，別遣大隊從間道襲城。君方巡隘，賊大至。君袖銅椎出擊，曰：「吾試觀賊能否。」乃揮椎斃賊三。餘賊環攻。君掣銅鐃格鬪，莫敢近。賊忽大呼曰：「印江已破矣。」君見四山火起，力戰突圍出，馳抵銅仁，乞師於太守周某。命練總王士秀領五百人隨君回擊。一日夜行二百里，居民見君至，皆奮躍得壯士千餘，仍從至雲泮。是日大霧，人馬對立不相見。噪而進。賊駭曰：「官兵至矣。」則皆走。自相蹴蹋墮崖死者數百。君復縣城追賊百餘里，至大寺頂。鄉民赴義者約二萬人，各誡其子弟。

曰爾不能從鄧公力戰無面目歸見父兄也當是時君冒矢石四十餘日戰中壩戰螺生溪戰袁家灣皆告捷八年正月勦撫鎭家壩及潮底河以東大定亡何而越境勦賊之檄至大堡者思南府境也奸民胡黑二倡亂太守周某討之數失利聞賊最畏君乃立鄧字旗懾賊而嚴檄君赴勦日三至士民以地非印境苦留之君慨然曰郡守檄縣令曷可違且殺賊固無畛域也眾請以二千人偕往君慮餉無所出以千三百人俱師次分水埡居民爭餽糧賊僞爲運糧者昧爽入營門變作團眾驚潰君親搏戰飛石中其首手格殺一賊足被創遂及於難喪其元年四十有一後軍聞前軍失事憤極殊死鬪殺聲與哭聲併卒奪君屍還乃樹忠憤軍幟誓

復仇賊懼夜退屯八十里時三月八日也喪歸士民大慟婦孺皆失聲無遠邇爭致賻贈有負販傭挈錢四緡將運鹽悉以充賻或曰如爾家何傭哭曰公死吾屬無葬所矣何以家爲其感人若此事聞得旨賜卹世襲雲騎尉印人醵重金歸其櫬母夫人猶在堂拊君屍哭曰爾能死王事吾家世世有光靈有知勿以我爲念印人聞言心稍安而益悲君之不能兩盡也君少負才名讀書兼習拳技令印時微行遇鬪者咆哮莫敢撓君躍入叢人中手擲其人文許叱曰去有識君者趨進欲與言而君去遠矣賊嘗遣刺客僞稱銅仁投牒者袖匕首將刺君君拉其脅曰吾不殺爾爾歸告賊酋速降當令復田宅毋死不悟也居嘗與客語袖中時時以手

作擊刺勢故能躬履諸險阨戰必身先士民懷其德立祠春秋祀之並刻君遺集曰鉅業堂稿又八年乃籲請建專祠並入祀名宦皆得 旨允行

贊曰君與余同舉於鄉屢見君恂恂儒者不知其兼資文武所成就及此也君學行皆本母教觀其言滂母曷加焉同治丙寅余治軍援黔印人士語及君皆泣下治團練至今守其法於是君死事八年矣父老口之如新各屯堡皆爲位以祀戊辰四月余帥師破大堡擒胡黑二及其一兄二弟暨僞軍師王茂蘭等乃設位告捷於君縛黑二等剖心致祭印人觀者數千皆大哭已復大快爭拊掌曰我公今可以瞑目矣烏庫君蓋死猶生也哉